

Анна ПЛІШКОВА

Сучасны сферы фунгованя кодифікованого русиньского языка на Словеньску

Проблем літературного языка Русинів в середньоевропейскім просторі і точніше в ареалі Карпат має веце як тристорічну історію. Языковий вопрос, який характерізовав културный і політичний живот Русинів, явить ся як історічний проблем уж од 17. стороча а пережив аж до сучасности, кедь стоїме на порозі 21. стороча. Діалектна роздробленость, културны і языковы традиції сусідів, набоженьскы, соціално-політичны і іншы факторы мали в тім регіоні значный вплив на выбераня языка регіональной културы: од церковно-славянського в ёго (велико)руський і український редакції, українського і (велико)руського літературных языків, аж по проекты літературного языка заложены на містній діалектній основі.

Як бы была написана комплетна історія письменства і літературного языка Підкарпатської Руси і сусідніх русиньских областей, потім бы ся указало, же тот регіон Славян – в словах визначного славісты Нікіты Тольстого – був своєю сорты „пробным простором творіня оптимальной варианты списовного языка“ (Magocsi, 1996). Но наперек близкости русиньского ареалу з великим українським етнічно-языковим ареалом, но і наперек тісним контактам з (велико)руськов културно-языковов традицієв, історічна память Русинів предцілем не дала їм забути на містну културно-языкову традицію. І зато в сучасности можеме быти свідками того, же якраз тот путь в карпатськім ареалі набывають конкретны контуры, а то в подобі кодифікованых варіантів русиньского літературного языка.

Зновуоживління языкового вопросу меджі Русинами є в центрі увагы нелем на Словеньску, але і в околитых країнах, де жыють Русины. Одповідь на вопрос, што є причінов актуалізації ці зновуоживління языкового проблему в карпатськім

ареалі по паді тоталітних режимів, vystигують слова Сергея Ткачова, же є то природный рефлекс, природна реакція на „револючність“ зреалізованих змін, котрых зачаток сягать к распаду двох імперій - Ракусько-Угорської і (Велико)Руськой (Ткачов, 1995). В звязи з тым ся родить цілый ряд проблемів в области культури, школства, медій ці сполоченьско-го живота, про вирішіння яких як першооснова выступав тзв. языковий вопрос ці точніше вопрос норматівного літературного языка.

Зачаток процесу кодифікації

Револучність doby, 1989 рік, як в северовыходній Европі в цілім, так і в бывшій Чесько-Словеньску, яка повалила силу тоталіты, не могла не засягнути і Русинів на северовыході Словеньска. Уж 26. новембра 1989, значить лем 10 днів по револучных акціях у Празі, в Пряшові vznikать “Ініціативна група русинів-українців за перебудову“, яка такой на першій мітингу выголосила, же “народностный вопрос Русинів в Чесько-Словеньску нігда дефінітівно вирішений не був“ (Зозуляк, 1989). Доказом повідженого був і 20. януара 1990 в Пряшові міморядный зъезд „Культурного союзу українських трудящих“ (КСУТ) за участи нелем делегатів містных організацій КСУТ, але і делегатів многих русиньских сел выходного Словеньска, представителів обидвох церквей – доведна понад 450 делегатів і гостів. Уж на тім зъезді делегаты з русиньских сел, главно з области Меджілаборець, остро одсудили минулый період українзації, „як найтемнішу сторонку нашої історії“, вымагали скінчити з українзаціїєв як продуктом тоталітного комуністичного режиму, ліквідацію КСУТ і створіння нової русиньской організації (Магочій, 1993). Наперек тому, рішення зъезду не принесло успокоїня, яке Русины чекали як сатісфакцію за минулы roky народностной і языковой негачії. Як реакція на даный факт в Меджілабірцях ся сформовав „Културный рух Русинів“, програмным цілём якого ся стало „оброджіння Русинів“. Меджі програмными цілями руху був і такий: „Треба створити русиньский літературный язык на основі діалекту Лабірціны, який бы як повинный предмет ся учів у 1. - 5. класах ОШ, на який бы потім подля жела-

ня родичів і на основі інтересу навязовав український літературний язык“ (Магочій, 1993).

Потреба ці непотреба русинського языка ся аналізувала в пресі і за округлыма столами. Выслідком дискусій было, же до того часу друкований орган ЦК КСУТ, тыжденник Нове життя, який в револючных часах перестав быти органом ЦК КСУТ, перетрансформовав ся на „тижневик русинів-українців Чехословаччини“, в яким зачали выходити дві сторонки на русиньскім діалекті під назвов „Голос русинів“. Пестрость русиньскых діалектів, нараз офіціално презентована з того періодіка, стала ся силным імпульзом на приправу першых норм будучого русиньского літературного языка. Із пропозицій норм, базованих на шпеціфіках лабірського діалекту, як першый вышов отець Франтішек Крайняк, парох Греко-католицькой церькви св. Василя Великого в Меджілабірцях. А наслідно матеріали публікованы в рубріці „Голос русинів“ зачали діставати подобу языковой нормы і стали ся основов приправлєваних матеріалів до нултого чісла часопису Русин (1990).

Зачінаючи 1990 роком, в пресі не утихали дискусії о тім „хто сьме“, як і о языковім вопросі. Ситуація зачала іншых дімензій наберати по трансформації лабірського руху до новой русиньской організації в Меджілабірцях – Русиньской оброды 25. марца 1990, цілєм якої подля штатуту ся стало - „пропаговати культуру, звыкы, традиції, історію у СВОЇМ ВЛАСТНІМ ЯЗЫКУ, формов культурно-освітной работы, новинок, розгласу, телевізії і под“. (Русин, 1990) Потреба кодифікації русиньского языка зачинать быти найактуалнішов, наведе выжадованов штатнымы органами перед заведжінєм русиньского языка до офіціалных сфер жывота Русинів – медій і школ. Тот факт зарівно ся став главнов темов полемік меджі представителями проукраїньской і прорусиньской орьєнтацій в Чесько-Словеньску, але і в іншых європських країнах, де Русины жыють.

Главно проукраїньскы учены в Чесько-Словеньску з роспаками принимали каждую ініціативу в аспекті створєваня норм будучого літературного языка, які поступно градовали і переростали аж до негатівістичных позицій, з яких выголошували „непотребность“ тзв. русиньского літературного язы-

ка, к створёванню якого, подля них, з філологічного аспекту неекзістує нияка причіна (Stec, 1992), і ароганції, яка дедале частіше ся зьявляла при характеристіках окремых особностей, залучивших ся до приправы норм. Появляня на світ далшого русиньского періодіка – „Народных новинок“ (1991) а з ним періодічности підкреслёваня потреби уніфікованых норм русиньского языка, принесло новы силы і новы приступы к нормованю языка.

Дедале частіше ся споминать думка створіня научной інштитуції, цілём работы якої бы было вирішыти принципіальны вопросы перед зачатём процесу кодифікації і приступити к роботі над потребныма кодифікачныма приручниками. Важнов подієв на пути к досягнутю того ціля было зорганізованя 1. Меджінародного конгресу о русиньскім языку в 1992 р., найважнішы пункты резолюції якого ся дотыкали концепчных вопросов: 1. кодифікація русиньского языка бы мала быти основана на живім языку, 2. каждый із штирех русиньских регіонів бы мав узаконити властный варіант літературного языка, заснований на переважаючім діалекті, 3. русиньский язык бы мав вжывати азбуку (Magocsi, 1996). Тоты основны принципы ся стали ведучов ідеєв, котров ся в далших роках керовали кодифікаторы русиньского языка з розлічных регіонів. Перший конгрес зась підтримав думку потреби русиньской научной інштитуції, яка до двох місяців досправды в Пряшові vznikла. Інштитут русиньского языка і культуры од свого взнику служыв як координачный центр работы кодифікаторів русиньского языка зо вшыткых країн, де жыють. Заслугов доц. ПгДр. Юрія Панька, к. н. в сполупраці з редакцієв Народных новинок був створений перший проект правил русиньского правопису (1994) і словник русиньской термінології („Русиньско-русько-українсько-словенсько-польский лінгвістичных термінів“ (1994). Під веджінєм другого діректора інштитуту Доц. ПгДр. Василя Ябура, к. н. Вышли в 1994 році далшы кодифікачны приручники – доповнены правила русиньского правопису, орфографічний словник, букварь і чітанка і зачала ся работа над граматіков.

Жаль, винов зміненой політичної ситуації на Словеньску в другій половині 1994 року офіціально ся кінчіть діятельство інштитуту, але практично работы над кодифікацієв кулміно-

вали а і наперек великим обштрукціям з боку як українофілів, так і окремих працівників штатной справы, 27. януара 1995 року в Братіславі був русинський язык на Словенську офіційно выголошений за кодифікований. Важне є, же даний факт акцептовали представителі культурного, сполоченьского, політичного і научного жывота Словенської републікы, што документовали нелем своєв участєв на нім, але і фінанчнов дотацієв акту кодифікації, звязаного з научным семінаром з меджінароднов участєв славістів.

Святочным актом кодифікації перша етапа работ над языком ся скінчила, але перед Русинів на Словенську і їх репрезентанта – Русинську оброду поставила такой дакілько новых пріорітних задач, реалізуючі котры ся обчековала і одповідь на вопрос уятя ся кодифікованого русинського языка в розлічних сферах культурно-сполоченьского жывота Русинів в условіях Словенської републікы. Іде главно о сферу сполоченьску, умелецьку, публіцистичну, конфесійну, школьску і літературну.

Сполоченьска сфера

Русинський язык, точніше єго діалекты, все были основным засобом комунікації меджі переважнов частєв Русинів, і в сучасности ся дана традиція у великій мірі утримує. Жаль, силный вплив асиміляції – завинений і ліквідацієв малокласных школ з языком навчання народности по русинських селах, і інтеграція молодых Русинів до школ міських з языком навчання словенським – ся не міг не одбити і на способі комунікації меджі Русинами, а главно молодых генерацієв, яка і в традично русинських селах при побіжній комунікації в сучасности часто вживать язык словенський. І здасть ся їм то природным явом, бо як в медіях, так школах, церквах а часто і дома мають можность чути словенський язык, розумлять го і знають.

В інакшій позиції ся находить середня і старша генерация Русинів, вихована іщі на впливах русофілства, українофілства, або докінця карпаторуських традиціях, яка – тотя усвідомленіша часть – або крітізує сучасне упущання молодых людей од старых традицій, або – тотя менше свідома часть – мовчить і беспомічно ся призерать на даний став, припадно

приучать ся комунікації в словенськім языку зо своїма внуками ці правнуками.

Наперек такій ситуації, штат створив условія на фунгованя материньскых языків народностных меншин жыючих в Словенській републіці і в сфері сполоченьскій, кедь в 1999 році прияв Закон о вжываню языків народностных меншин. На ёго основі наслідно по списованю людей (2001), в 92 селах Пряшівского краю, де жыє мінімално 20% Русинів, закон гарантує право на вжываня материньского языка в уряднім контактованю, напр. на сільскых урядах, поштах, в шпиталях, на судах, в школах, церьквах і іншых інштитуціях, де, треба підкреслити, же містны русиньскы діалекты ся беспосерднё выужывали і перед приятём споминаного закона. Подля нас, русиньскый язык, респ. ёго діалекты на Словенску в уряднім контактованю ся вжывать в омного бівшій кількості сел, а то і в таких, в котрых подля штатістікы жытелі даной народности не творять 20% населіня, але в скutoчності в каждоденній комунікації вжывають переважно дакотрый з русиньскых діалектів. Кількість сел, на якы в будучности ся може росшырити платность споминаного закона на хосен народностной меншины, залежить лем од нёй самой – ці при далшых списованях людей буде у бівшій мірі декларовати свою приналежность к русиньській народности і такому же материньському языку.

Умелецька сфера

Під умелецьков сферов, попри діяльстві многих екзистуючих аматерьскых сільскых колектівах, розвиваючих і пропагуючих переважно фолклорне богатство Русинів, будеме розуміти главно діяльство единого у світі русиньского професіонального театру – Театру Александра Духновіча у Пряшові з ёго співацько-танечным колектівом „Пульс“. У своїй історії бив театр интересный тым, же ся став першов „україньсков“ културнов інштитуцієв, яка в пряшівскім регіоні vznikла по другій світовій войні з назвов „Український національний театр“. Іронічно, же якраз она в половині 90. років 20. стороча ся стала зась першов прорусиньскы орьєнтованов, у своїм діяльстві як перша зачала вжывати русиньскый діалект. Но в своїй основі тот факт мож цалком добрі

порозуміти: пряшівський театр як заяздовий все був і є одказаний на публіку регіонів северовыходного Словеньска, в якім гро насеління творить русиньске етнікум з материньським языком русиньським. З цілём утримати собі приязень публікы така зміна была неминуча. А револючны події 1989 року лем ускорили акт зміны і самой назвы театру (октобер 1990), яка в пореволючных условиях вызерала скоріше як анахронізм.

Наперек даным змінам, веджіня театру од зачатку 90.-х років 20. ст. репертоар ставляло двоязычно – по русиньськы і по українськы. Спершу пропорціонално, але інтерес публікы собі і ту выжадав зміну. Результатом непринимання жытелями русиньських сел гер театру в українськім языку, є сучасный ёго репертоар, який ся грає лем по русиньськы. А не суть то лем гры містных авторів, але і світова класіка. Модерный приступ ку театру гостюючіх режисерів звязаний з вживанём людём зрозумілого языка, принесли тій культурній інштитуції в послідніх 10 роках успіх нелем на домашніх, але і на світових сценах, фестивалах. Діятельство драматічного колективу театру ся стає предметом рецензій словеньской театралной критікы, яка го оцінює уж дакілько років за найліпший професіональний народностный театр на Словеньску, але ёго роботу зрівнує і з найліпшыма словеньськыма театрами. Оцінінём ёго професіональности є і двойразова номінація герця русиньского театру на престижну цілословеньску ціну „ДОСКІ“ за найліпший герецький выкон сезоны.

Публіцистична сфера

Публіцистична сфера вживання русиньского языка є презентована главно друкованыма періодікамы Русиньской оброды – тыжденником „Народны новинкы“ і двоймісячником „Русин“. Обидва зограла найважнішу роль при формованю нормы русиньского літературного языка а потім при уводжованю кодифікованой подобы русиньского языка до жыво-та. Главно „Народны новинкы“ ся стали тым періодіком, де ся вели і ведуть діскусії нелем на народностны, церьковны, але і на языковы темы, ку котрым можуть ся слободно высловлєвати їх читателі, але і шырша громада. Їх заміряня є цілословеньске, но з акцентом на регіоны северовыходного Словеньска. напротівагу, часопис „Русин“ є орьєнтований

інтеррегіонально, што значить, же своє місто в нім мають Русини зо вшитых країн карпатського ареалу (Словенсько, Україна, Польско, Мадярьско, Сербія), враховано Чеськой републіки, Сполєных штатів америцьких і Канады. Часопис ся занимать і вопросами русиньской літературы, як і набоженьского жывота Русинів.

Културно-сполоченьскый живот Русинів в їх материньскім языку на Словенську суть призначены обгосподарёвати і дві електронічны – верейноправны медії – Словенська телевізія і Словенський розглас, повинностєв яких зо закона є высылати і про жытелів СР, які творять народностны меншыны. Покры в Словенській телевізії, Главній редакції народностного высыланя в Кошіцях ся закон по часі і жадостях Русинів днесь респектує, выслідком чого є výroба самостатных русиньских магазінів, сітуацію ся не дарило на хосен Русинів ани по 10 роках змінити в Словенськім розгласі, а то наперек екзістенції Главной редакції народностно-етнічного высыланя в Пряшові, де своє пропорціональне заступління мали бы мати вшиты народностны меншыны і їх материньскы языки на теріторії выходного Словенська. Наперек тому офіціалный погляд веджіня Словенского розгласу і в такій сітуації був, же дана інституція односно Русинів „дотримує вшиты законы“, причім реалізація тзв. „русиньско-україньских“ релаций „є повно в згоді із реално народностнов сітуацієв“ (Плішкова, 2001). Но реална сітуація была така, же Русини іщі ініціатівніше ся зачали домагати самостатного радіовысыланя з Пряшова, на основі чого веджіня наконець мусило приступити на конкретны зміны і ту: в першім ряді од 1. 9. 1998 на диференцоване высыланя про Русинів і Українців, яке але по пару місяцях назад зникло, а дале – по новых протестах Русинів – к выписаню конкурзу на 2 міста редакторів до „тіму высыланя в русиньскім языку“, што і так дефінітівному вирішіню проблему не помогло. Наслідно Русиньска оброда ся обернула з офіціалнов жадостєв помочі проблем рішыти на меджінародну інституцію – Раду Европы до Штрасбургу, яку підпорила петічныма підписами за самостатне русиньске высыланя жытелів Словенской републіки. Тиск Русинів на компетентны інституції і по приязных выслідках списованя людей (май 2001) про Русинів предці лем спосо-

бив, же в рамках новой організаційної структури, яку Словенський розглас прийняв зачатком року 2002, ся редакція справодайства в прашівськім радію офіційно розділила на самостатны части, єднов з яких є офіційно декларований і „тім русиньского высыланя“ (Плішкова, 2001).

Конфесійна сфера

Ніжна революція в Чесько-Словенську мала позитивный вплив, главно на грекокатолицьку церкву. Наперек тому, же ей найвышшы круги все веце мінять свою орьєнтацію на словенську – преферують выслугованя і нелітургічных частей церковных обрядів по словенськы, а то і в селах з перевагов по русиньськы бісідуючого насеління – в тій самій церкві є 20 священників, які просаджують тенденцію, жебы релігійны книжки ся перекладавали до русиньского языка і вживали ся на богослужбах і на годинах релігії. Найвызначнішым з них є о. Франтішек Крайняк з Меджілаборець, який за помочі містного духовенства і лаїків переложив до русиньского языка основны церковны тексты, котры ся в сучасности ужывають в дакотрых парохіях з домінуючим жытельством русиньской народности. Суть то: Апостолы на неділі і свята цілого року переложены о. Франтішком Крайняком до лабірського діалекту (1985) і Євангелія на неділі і свята цілого року (1986), які по уділіню імпріматуру вышли в кодифікованій нормі русиньского языка в 1999 році. Окрем того Ф. Крайняк переложив Тайны: крещіння, міропомазаня, евхаристія, покаяня, манжелство, елеёпомазаня (1986); Крестна дорога Господа нашого Ісуса Хріста (1988); молитвеник св. ружанця (1992); Малай грекокатолицький катехізм про русиньскы діти (1984), Євангеліє од св. Іоана (2002).

Поки іде о православну церкву, тот обвинює грекокатоликів з помаганя процесу латинізації і словакізації. Притім, в аспекті заставління того процесу і выявління своєї позиції односно русинства, русиньского языка і можности приближити ся к віруючим якраз таким способом, як часть священників грекокатолицької церкви, доднесь не выявила свою позицію. Подобно як в грекокатолицькій церкві, і в православній по многих русиньських селах служать священники родом Словаки, яких не барз інтересує народностный аспект їх діятель-

ства. Окрем того, історично якраз православна церквова ся звязує з політиков наступу комунізму в бывшій Чеськословеньській републіці, в рамках якої є зась обвинёвана з українофілства і русофілства. Хоць і в рамках той церкви екзистують духовны, які бы были охотны помагати процесу заведжіня русиньского языка до православных храмів в регіоні северовыходного Словеньска, офіціална позиція ей найвысших кругів затыль хыбить. Значіть, обидві церкви выходного обряду, діючі в регіоні, де компактно жыють Руси́ны, очівидно суть орьєнтованы каждая іншым боком. А десть все-редині зістають Руси́ны, які суть часто одказаны на милость або немилость церковных єрархів або окремых священників, ці ся в них проявить народностне чутя і ці суть охотны акцептовати народностне чутя своїх вірників. Право чути материнський язык у церквах выходного обряду доднесь на Словеньску ся не реалізує на достатній уровни. Лем пронародно роздумуюча часть грекокатолицьких священників на Словеньску робить конкретны крокы на зміну ситуації, бо можность захраны як выходной традиції своєї церкви, так народностного аспекту в ній видить у зряджіню уряду єпископа спеціално про Руси́нів ці парохії з домінуючим русиньским жытельством. Першым кроком к тому, може, є створіня функції вікаря (2003) в рамках Грекокатолицького єпископского уряду в Пряшові.

Школьска сфера

Дану сферу Руси́ны поважують за найважнішу од самого зачатку возроджованя русиньской народности і русиньского языка. Ведучі представителі Руси́нів собі усвідомлєвали, же абы ся цалком не вытратив ці не вымер русиньський язык, треба зробити вшытко про то, жебы був зась заведений до основных школ, але лем там, де о то проявлять інтерес родичі, значіть, на базі добровольности.

Недавна історія говорить, же бывшы русиньскы (респ. руськы) школы были насилным адміністративным способом в 1952 році змінены на українськы. Переважна часть Руси́нів тоту зміну не прияла, а то з той причіны, же український язык не поважовали за свій материнський язык. І зато Руси́ны зачали масово свої діти посылати до школ словеньских.

Факт, же в минулых 45 роках ся школы в русиньскых містах і селах пословенчили, Русины не принимали як трагедію. Выходивши з реалности, же русиньскы школы, так як і русиньска ідентичность подля закона ся стали про них неприпустныма, українську орьєнтацію в животі і школстві з бівшой части принимали як чужду, орьєнтація на словенський язык про них была найраціональнішым рішінём. Ведь Словенсько было і є штатом, котрого Русины обчанами суть, были і будуть, а з того выходили, выбираючи собі і языкову орьєнтацію в школстві.

Аж конечно кедь на кінці 20. стороча і жытелі Словенська дістали можность випробовати живот в демократічній републіці, в новых условиях ся і в Русинів назад зачало пробужовати роками придушоване народне сумління. Новоприниманы законы демократічної републікы, возроджуючий процес Русинів і їх материньского языка – вдяка сістематічному дожадованю ся Русиньской оброды на Словенську – зачали акцептовати, внаслідку чого од школьского року 1997/1998 в 12 основных школах северовыходного Словенська був проявленный інтерес родичів школярів завести выучованя русиньского языка. К тому акту были приправлены і з помочов штату выданы вшиткы потрібны педагогічны документи (Konceptcia vzdelavania deti obcanov SR rusinskej narodnosti; Konceptcia vyucovania predmetu rusinsky jazyk; Ucebne plany pre zakladne skoly; Ucebne osnovy pre zakladne skoly), як і учебники русиньского языка про основны і середні школы. Але основнов задачов і в сучасности зістає освітна робота меджі родичами, жебы порозуміли вызнам даного процесу і записовали свої діти на выучованя предмету русиньський язык і култура.

Пріорітов про Русинів в школьській сфері є як росшырёваня выучованя предмету русиньський язык і култура на обидвох ступнях основных школ і дакотрых гімназіях в регіоні северовыходного Словенська, так і вихова будучіх кваліфікованых педагогів про даный предмет. Наперек тому, же уж од 1993 року ся евідують снагы Русиньской оброды на Словенську створити катедру русиньского языка і културы на котрійсь з пряшівських факулт, докінця на тот ціль штат в 1994 р. выділив 1,5 міліона корун на ей заряджіня, доднесь

такої катедри ніт. Місто нёй в 1998 році vznikать як ректоратне працювіско Пряшівской універзіты Інштiтут народностных штудій і чужіх языків, в рамках якого зачало як перше фунговати Одділіня русиньского языка і културы. Но таке рішiня лем на час вирішыло проблем приправы педагогів, і то не в повній мірі. Проблем є в тім, же выучованя русиньского языка в рамках Інштiтуту є в позиції предмету „волительного“: можуть собі го зволити штудувати – як проглублену форму штудія – штуденты Педагогічної факулты, а як меджіодборове штудіум штуденты хоцькотрой факулты Пряшівской універзіты, окрем штудентів Педагогічної факулты Пряшівской універзіты, предмет русиньскый язык і култура штудують главно штуденты Філозофічної факулты ПУ. Із споминаных причін о штудіум офіціално абсентує інтерес богословців православної ці грекокатолицької богословской факулты, і хоць неофіціално о нёго інтерес проявлюють. Но винов абсенції самостатной катедры ніт можности, наперек значному інтересу, штудувати русиньскый язык і културу як самостатный штудійный одбор, респ. в комбінації з якимсь іншим предметом, абсолвенты якого бы здобыли кваліфікацію і про вшыткы споминаны сферы културно-сполоченьского жывота Русинів. А створіня катедры очівидно є задачов, вирішiня котрой зістане в сфері школства пріорітнов в далшій періоді нелем про Русиньску оброду, але і про сучасных працювників Інштiтуту народностных штудій і чужіх языків Пряшівской універзіты.

Літературна сфера

Літературна сфера Русинів на Словеньску є єдинов, де абсентує перерваня контінуйты сучасности з минулостёв. Русиньска література все мала особности, якы то з бівшов, то з меншов силов вступали на літературну сцену, в залежности од сполоченьско-політичної ситуації і од авторьского потенціалу. Література творена в русиньскім языку vznikала як в часах, коли вшыткы Русины жыли в єдній імперії і не мали забороны голосити ся к русиньській народности – авторы А. Падальскый, І. Выслоцькый, А. Коцак, А. Вальковскый (18. ст., мотівованы і переселенецьков літературов, яку творили Русины в Северній Америці – Емілій Кубек, Штефан Варзаль,

Іван Ладіжінський); І. Ріпа, П. Лодій, М. Андрейкович, А. Лабанц, Т. Подгаєцька, А. Крігер-Добрянська, М. Невицька, А. Духнович, П. Кузмяк, А. Павлович (19. ст.); так і в новій Чеськословенській республіці а нескорше в повоєнній Чеськословенській соціалістичній республіці (20. ст.) – автори І. Жак, І. Новак, А. Цапцара, А. Галгашова, Н. Гвозда, А. Галчакова, Ю. Матяшовська, Ш. Смолей, М. Полчова, Е. Цапцара, А. Владыкова, О. Кудзей – творили наперек заказу русиньской народности, ку котрым по році 1989 прибыли авторы передтым пишучі по українськы - Штефан Сухий, Марія Мальцовська, Юрій Харитун, Миколай Ксеняк. А не іншак тому є і в самостатній Словенській республіці (на зачатку 21. ст.), коли по заведжіню до школ предмету русиньський язык і култура к споминаным старшым авторам, сістематічно публіковавшим свої творы главно в прилозі „Народных новинок“ - „Поздравлію Русинів“ і часописі „Русин“, ся зачінають поступно придавати і молоды авторы, школярі і штуденты, котры од кінця 2000 року ся зачали публіковати в кварталнику про русиньскы діти і молодеж „Русалці“ - далшій прилозі „Народных новинок“.

Говорячі о уровни літературного процесу Русинів Пряшівщини треба підкреслити, же не быти розлічных языковых впливів і орьєнтацій, як наслідку політичных впливів сусідніх країн, література Русинів Словенська в сучасности бы могла ся пышыти омного бівшым чіслом авторів а самособов і вышов умелецьков уровнєв. Но наперек тяжкій сітуації і стагнації розвитку літературы в русиньскім языку, котру розвиваючому ся літературному процесу з 20. років 20. ст., потім лібералізації сполочности в 60. роках, наслідно завдав період „будованя соціалізму і комунізму“, агресівно придусившый спробы о возроджованя русиньского народа і языка, народноязычна русиньська орьєнтація вытримала і пережыла, глядаючі і находжаючі силну опору як у фолклорній народній творчости, так в релігійно-церковній письменности в русиньскім языку, якы мали од прадавна довгу традицію меджі Русинами. Зато не є ниякым чудом, же першы народны авторы – Іван Жак на Спішу, Іван Новак на Маковіці, Марія Дуфанцева у Пряшові, Юрко Колинчак на Снинщині, Николай Горняк на Лабірщині – творили в тій традиції. Не каждому з

них ся пощастило надруковати свої поезії-співы в тогдышній пресі, але они вшиткы творили тот зародок, з котрого в повоиновых часах, окреме од 60. років, выросли і розвинули ся писательскы поетичны самородкы, з творчости котрых была видана книжка „Зелений віночок, червоні квіточки“ (1965). На тоту літературну творчость старшого покоління надвязовали высшеспоминаны поеты і писателі, зачінаючи свою літературну путь аж в повоиновых роках. В їх творчости ся уж выразніше проявлять амбіція літературно ся виділити меджі своїма сучасниками: є в них бівша снага освоїти собі теорію творіння літературных жанрів на основі освіти і особного інтересу к літературі. Од такой літературной роботи був уж лем крок к літературній творчости на професіоналній уровни, котра у Русинів зачала vznikати в 60. - 70. роках (Хома, 2000). Спомеджі виданых творів того часу можеме спомянути: антологію „Карпати піснюю вчаровані“ (1974), зборникы: Івана Жака „Маковицькі нути“ (1960), Юстины Матяшовской „Орябиньський вінок“ (1975), Николая Гвозды „Маковицькі дзвіночки“ (1976), Юрка Колинчака „Підвигорлатська бистрина“ (1977), Анны Галчаковой „Окрилені мрії“ (1978), „Балады“ (1984).

Література Русинів Словеньска свого повного возроджіння заживать по 1989 році, коли ся мінять условія розвитку і про Русинів як народность наперед в Чесько-Словеньській федеративній републіці а од 1993 року і в самостатній Словеньській републіці. Вдяка підпорі штату при книжковім выдаваню літературы Русинів, виходять на світло новы зборникы поезій і прозовы творы а ку авторам знамым з минулых часів прибивають новы, котры переходять з українського або і (велико)-руського языків на русиньський, бо тоту путь поважують за природну в сучасній етапі розвитку културы Русинів, і докінця ініціюють в 2001 р. зрод писательского субекту – Сполку русиньських писателів Словеньска. Спомеджі них треба спомянути в першім ряді поетів Штефана Сухого, який є автором штирєх книжок в русиньскім языку, зборників поезій „Русиньський співник“ (1994) і „Енді сідать на машину вічности“ (1995), зборника повідань „Як Руснакы релаксують“ (1997) і стишковой книжки з нотами про основны школы з навчанєм русиньского языка „Азбукарня“ (2004); Юрка Харитуна (по-

етичный зборник „Гуслі з явора“, 1995), прозаїчку Марію Мальцовску, яка є авторков трёх зборників повідань в русиньскім языку: „Манна і оскомина“ (1994), „Під русиньскым небом“ (1998), „Русиньскы арабескы“ (2002), і книжки приповідок про діти „Приповідкова лучка“ (1995), котры в р. 2000 были wydаны і формов магнетофонової казеты; і байкаря Миколая Ксеняка, автора книжки „О Камюньскых майстрах“ (1994), книжки повідань „Біда Русинів з дому выганяла“ (2002) і зборника баёк „Выбраны байкы“ (2002). Спомиnаны авторы творять літературу професіоналной уровни, яка може конкуровати іншоязычній літературі. Центром увагы сучасных русиньскых писателів суть проблемы чоловіка, села, народности, языка, але і філософічны роздумы над бытём в сучасній економічно нелегкій добі, традиції, церьков, народны ремесла. Вдяка приступности языка у своїх читателів здобывають сімпатії а вдяка якости окремых літературных жанрів суть перекладованы до інших языків і публікованы в словеньскых і заграничных періодіках. Доднесь трое найліпшы з русиньскых авторів Словеньска Ш. Сухый, М. Мальцовска і М. Ксеняк ся можуть похвалити престижнов цінов Александра Духновича уділёванов Карпаторусиньскым научным центром в США за найліпшу книжку русиньской літературы.

ЛІТЕРАТУРА

Зозуляк, О. Перший крок Ініціативной групи. Нове життя. Пряшів, 1. XII. 1989. С. 2.

Магочій П. Р. Тривалість регіональних культур: Русини і українці на їхній карпатській батьківщині та за кордоном. Нью-Йорк, 1993. С. 66.

Magocsi P. R., ed. A New Slavic Language is Born/Zrodil sa nový slovansky jazyk. New York, 1996. P. XIII.

Плішкова А. Компетенція на зміну внуторной штруктуры высыланя є в руках шефредактора Пряшівського штудія – інтервю з централным діректором Словеньского розгласу в Братіславі, ПгДр. Ярославом Резніком // Народны новинкы/ Пряшів/ Ч. 11 - 14, 28. III. 2001. С. 5.

Плішкова А. Професіоналіта на першім місті – інтерв'ю з шеф-редактором Главної редакції народностно-етнічного vysylanya Slovenskogo rozglasu в Пряшові, ПгДр. Войтехом Бачом // Народны новинкы. Ч. 11 - 14, 28. III. 2001. С. 5-6; Самостатне русинске vysylanya zasъ na dosyag ruky? // Народны новинкы. Пряшів. Ч. 16-17, 25. IV. 2001. С. 1-2.

Становы Русиньской оброды на Словеньску. Русин. Меджілабірці, 1990 .

Ткачов С. Статус литературного языка русинов на Украине // Slavica Tarnopolensia. Ч. 2. Тернопіль, 1995. С. 21.

Tolstoj N. I. Introduction/U'vodom // Magocsi P. R., ed. A New Slavic Language is Born/Zrodil sa novy slovansky jazyk. New York, 1996. P. XIII.

Štec M. K otázke „rusínskeho“ spisovného jazyka. Prešov, 1992. С. 22.

Хома В. Русиньска література на Словеньску в остатніх роках // Русин. XI, 5-6. Пряшів, 2000. С. 2.